

Ol
pikinini
i mas
kamap
santu



Dia ol pikinini:

Long dispela mun bilong Buk Baibel yumi laik toktok liklik long pasin bilong i stap gutpela pikinini na i stap holi. Long wanem Jisas i laik bai yumi olgeta i kamap holi na i go i stap wantaim em long heven.

Yumi mas putim yau na lainim gut ol samting!

PASIN BILONG I STAP HOLI EM I WANEM SAMTING?

Pasin bilong i stap holi em i pasin bilong bihainim gut ol mandato bilong God. Sapos yumi bihainim gut ol 10-pela mandato bilong God, orait yumi bai i kamap santu na go long heven.

Long Buk Baibel i gat stori bilong wanpela yangpela boi i kam lukim Jisas, na dispela boi i tokim Jisas olsem em i laik go long heven na kamap santu. Na Jisas i bekim tok bilong em olsem: «**Sapos yu laik kisim laip i stap gut oltaim, yu mas bihainim ol lo bilong God**» (Matyu 19:17). I min olsem: sapos yumi bihainim gut ol 10-pela mandato bilong God, orait yumi tu bai i kisim laip i stap gut oltaim long heven.

NA YUMI BAI I KAMAP SANTU OLSEM WANEM?

Sapos yumi laik kamap santu, orait yumi mas bihainim gut dispela 4-pela samting:

1) Namba 1 samting: yumi mas bihainim gut ol 10-pela mandato bilong God! Dispela em i nambawan samting na i winim ol arapela!

Dispela pasin bilong bihainim gut ol mandato em i mak bilong laik pasin bilong yumi i go long Jisas, na i soim Jisas olsem yumi laikim em tru.



2) Namba 2 samting: yumi mas beten olgeta de! Jisas yet i tok olsem yumi mas beten oltaim, long wanem beten i save strongim yumi, olsem na yumi bai inap long sakim ol tok bilong Satan na yumi bai i inap long abrusim ol sin. Olsem na sapos yumi laik i stap gut, orait yumi mas beten olgeta de, bai yumi ken painim strong bilong bihainim Jisas gut!



3) Namba 3 samting: yumi mas kisim santu komunio oltaim! Dispela em i bikpela samting tumas! Long santu komunio yumi kisim Jisas yet i hait i stap long hostia, olsem na yumi pas wantaim Jisas na i kamap wan wantaim em. I no gat wanpela samting i ken winim santu komunio. Nogat tru! Santu komunio i winim olgeta samting bilong dispela graun!

4) Namba 4 samting: yumi mas konpes planti taim! Long konpesio Jisas i save tekewe olgeta sin bilong yumi, olsem na sol bilong yumi i kamap klin gen. Olsem na sapos yumi konpes planti taim, orait sol bilong yumi bai i klin oltaim na em bai i nais tru long ai bilong Jisas, na Jisas bai i amamas long yumi!





NO KEN LUSTINGTING!

Dispela 4-pela samting bai i helpim yumi long go long heven, olsem na oltaim yumi mas bihainim gut ol dispela samting! Planti taim lespasin i laik winim yumi na yumi save pilim les long go long Santu Misa o go long konpesio, tasol yumi mas winim lespasin bilong yumi na soim Jisas olsem yumi laikim em wantaim olgeta strong bilong yumi!

Santu Misa i mas stap nambawan samting insait long laip bilong ol pikinini, long wanem Jisas yet i stap long em!

Santu Misa em i sakrifais bilong Bodi na Blut bilong Jisas. Yumi save ofarim dispela sakrifais long alta, tasol Jisas i bin ofarim dispela sakrifais long diwai kros, taim em i givim laip bilong em yet bilong kisim bek yumi. Olsem na ol pikinini i mas i go long santu Misa olgeta Sande, long wanem Jisas i wetim yumi!



**WANPELA
SAKRIFAIS
TASOL!**



**TAIM YUMI
GO LONG
SANTU
MISA
EM I
WANKAIN
OLSEM YUMI
GO LONG
KAL VARI!**

**OLSEM NA
SOL
BILONG YUMI
I MAS KLIN
OLTAIM, BAI
YUMI I KEN
KISIM
JISAS
LONG SANTU
KOMUNIO!**

*Man i kaikai bodi
bilong mi na i dringim blut
bilong mi, em i stap long mi,
na mi stap long em*

(Jon 6:56)



Harim dispela stori bilong santu Gemma!

Santu Gemma i tok: «Long de stret bilong nambawan Komunio bilong mi, Jisas i kirapim tingting insait long bel bilong mi, na mi pilim bikpela laik long kamap sista.

Mi redi long go long haus lotu bilong kisim nambawan komunio bilong mi, tasol pastaim mi kisim wanpela pepa na raitim dispela 5-pela promis long Jisas:

1) Bai mi konpes na kisim Santu Komunio oltaim, na oltaim bai mi redim mi yet gut long kisim Jisas.



2) Bai mi visitim Jisas long tabernakel oltaim. Na taim mi bel hevi, bai mi visitim em moa moa yet.

3) Olgeta nait bai mi askim santu Maria long sambai long mi. Na bai mi mekim penans bilong redim mi yet long ol Bikpela Pestode bilong santu Maria.

4) Mi no ken lustingting olsem oltaim God i save lukluk long mi na skelim ol pasin bilong mi.

5) Na oltaim mi harim belo bilong haus lotu i pairap, bai mi tok: "Jisas bilong mi, marimari long mi"».

Ol pren bilong Jisas!

YU MAS RAITIM NEM BILONG OL MAN NA MERI I BIN I STAP PREN BILONG JISAS!

1) Mama bilong Jisas. 2) Ensel i bringim tok long Maria. 3) Man i raitim namba 3 Buk bilong Gutnius. 4) Pren bilong Jisas i bin kirap long matmat. 5) Aposel i go pas long Katolik Sios. 6) Man i raitim namba 2 Buk bilong Gutnius. 7) Papa bilong santu Jems na Jon. 8) Brata bilong santu Jon. 9) Waspapa bilong Jisas. 10) Ensel i kepten bilong ami bilong heven. 11) Trupela nem bilong santu Pita. 12) Aposel i no bin bilip long kirap bek bilong Jisas. 13) Papa Santu bilong yumi.

1) M _ _ _ _

2) _ _ _ _ I _ _

3) L _ _

4) _ _ _ A _ _ _

5) _ I _ _

6) _ _ K

7) _ _ _ _ _ I

8) _ _ M _

9) J _ _ _ _

10) _ _ I _ _ _

11) S _ _ _ _ _

12) _ _ _ A _

13) _ _ _ _ S _ _

1) Maria 2) Gebriel 3) Luk 4) Lazarus 5) Pita 6) Mak 7) Sebedi 8) Jems 9) Josep 10) Matkel 11) Salomon 12) Tomas 13) Fransis

Rot bilong mekim gutpela konpesio



1 – Namba 1 samting em i olsem: yu mas **TINGIM**

gut olgeta sin yu bin mekim long las konpesio i kam inap nau. Yu mas tingting gut na painim ol sin yu bin mekim.



2 – Namba 2 samting em i olsem: yu mas **SORI** long

ol sin bilong yu, long wanem yu save pinis olsem ol sin bilong yumi i bin kilim Jisas i dai.



3 – Namba 3 samting em i olsem: yu mas tokim Jisas

olsem yu bai i wok hat bilong **ABRUSIM** ol sin, long wanem yu no laik mekim sin gen. Nogat. Yu laik i stap gut.



4 – Namba 4 samting em i olsem: yu mas **AUTIM**

ol sin bilong yumi long pris. Yes, yu no ken sem o tingting planti, long wanem pris em i Jisas yet.



5 – Namba 5 samting em i olsem: yu mas

inapim gut ol **PENANS** pris i save givim long yu.

Mama Maria i laikim tumas ol pikinini bilong graun!

Inap yu kalarim dispela piksa?

**PUTIM YAU LONG KALA SKIN BILONG WAN WAN PIKININI,
LONG WANEM OL I NO WANKAIN!**





*Santu Dominik Savio
i mekim 4-pela promis
long Jisas olsem:*

1) Bai mi konpes na kisim
Santu Komunio olgeta
taim.

2) Olgeta Sande bai mi go
long Santu Misa.

3) Jisas bai i stap nambawan
pren bilong mi.

4) Mi no laik mekim sin.
Nogat. Mobeta mi laik i dai
pastaim.

**NAU YU TU MAS RAITIM 4-PELA PROMIS
LONG JISAS, NA ASKIM EM LONG HELPIM
YU LONG INAPIM OL GUT!**

1 -


2 -

3 -

4 -



Ensel Gebriel i laik bringim
tok long santu Maria na
askim em long kamap
Mama bilong Jisas!
Helpim ensel Gebriel long
painim rot bilong i go long
taun Nasaret!





Mama Sios i makim

santu Aloisius Gonzaga

*olsem was santu bilong helpim yumi
long bibainim klinpela pasin.*

*Sapos yu laik bibainim klinpela pasin
na abrusim ol pasin doti i gat sem,
orait yu mas mekim dispela samting:*

**1) Prea, na Santu Misa na konpesio
oltaim!**

**2) Askim santu Maria na was
ensel bilong yu long helpim yu.**

**3) Abrusim ol pren nogut na
ol samting nogut i laik pulim yu long
mekim sin.**

**4) Mekim penans na sakrifais,
bai bodi bilong yu i no ken bosim yu.**

*Sapos Jisas
i tokim yupela long
mekim wanpela samting,
orait yupela i mas mekim*

(Jon 2:5)



LCI Goroka
Biblical commission